

Акафист
Пресвятой Богородице в честь
Чудотворной иконы Ее
«Неупиваемая Чаша»

Кондак 1

Взбранное и дивное нам избавление даровася Твой образ честный, Владычице Богородице: яко избавльшеся явлением его от недугов душевных и телесных и скорбных обстояний, благодарственная благохваления приносим Ти, Всемилосердная Заступнице. Ты же, Владычице, Неупиваемую Чашею нами именуемая, приклонися благоутробно к нашим воздыханием и воплем сердечным и избави страждущих недугом пианства, да с верою воззовем Ти:

Радуйся, Владычице, Неупиваемая Чаше, духовную нашу жажду утоляющая.

Икос 1

Ангельстии чини и праведников сонми непрестанно славят Тя, Царицу всех Богородицу, ходатайствующую о многогрешнем роде христианством, погрязшем в беззакониях, пребывающем во гресех: даруеши бо ему во утешение и спасение милость Свою чрез многоименныя чудотворныя иконы Твоя, ихже яко звезды небесныя по всей земли нашей зрим. К единому же от сих образу, Неупиваемая Чаша именуемому, припадающе, из глубины сердца взываем Ти:

Радуйся, неприступнаго Божества селение;

радуйся, непрестанное людей удивление.

Радуйся, скорбьми немощи наша очищающая;

радуйся, милость Свою чрез чудотворныя иконы Твоя нам низпосылающая.

Радуйся, явлением тех скорбная сердца наша возвеселяющая;

радуйся, благодарственная Богу пети научающая.

Радуйся, пречудное всех к Богу примирение;

радуйся, геенны вечныя избавление.

Радуйся, Владычице, Неупиваемая Чаше, духовную нашу жажду утоляющая.

Кондак 2

Видящи, Пресвятая Владычице, сердечныя скорби, душевныя муки и искреннее покаяние людей, одержимых недугом, губительною болезнию пианства, благоволила еси явити богоспасаемому граду Серпухову милость Твою явлением пречуднаго образа Твоего, именуемаго Неупиваемая Чаша, да вси к нему припадающии с верою и сокрушенным сердцем, получивше исцеление от тяжкаго недуга своего, из глубины души вопиют: Аллилуия.

Икос 2

Разум неудобь разумеваемый трикратнаго явления преподобного Варлаама и повеления его в путь шествовати в богоспасаемый град Серпухов разумети ища, человек некий, страждущий недугом пианства, отъиде во град Серпухов и обрете тамо во Владычнем монастыре икону Твою святую, Неупиваемая Чаша именуемую. Мы же, видяще таковое Твое о нас, грешных, попечение, с благоговением вопием Ти:

Радуйся, чрез благочестивых людей славу чудес Твоих грешником открывающая;

радуйся, Путеводительнице прозорливая, путь спасения им показующая.

Радуйся, всеблагая наша Наставнице, любовь Твоею нас привлекающая; радуйся, за вся благодеяния Твоя благодарению нас научающая.

Радуйся, скорбь нашу в радость претворяющая; радуйся, несумненною надеждою нас увеселяющая.

Радуйся, губительныя страсти наша разрушающая; радуйся, благим намерением способствующая.

Радуйся, Владычице, Неупиваемая Чаше, духовную нашу жажду утоляющая.

Кондак 3

Сила Вышняго благодатию Владычицы укрепи некоего человека, страждущаго недугом пианства, егда он, ноге расслабленный имый, иде во град Серпухов, повеление Богоматере, чрез преподобнаго Варлаама возвещенное, исполняя, и обрет Пречистыя Богоматере икону, абие исцеле от недуга своего душевнаго и телеснаго и из глубины души воззва Богу: Аллилуия.

Икос 3

Имуще источник неоскудный и неупиваемую чашу небесных дарований, не токмо людие града Серпухова, но и вси православнии христиане от иных

градов и весей к Твоему пречудному образу притекают и, пред ним получающе исцеление, припадающе, благодарственными усты вопиют Ти:

Радуйся, Купеле, в нейже вся наша скорби погружаются;

радуйся, Чаше, еюже радость спасения нашего восприемлем.

Радуйся, немощи наша телесныя врачующая;

радуйся, язвы греховныя исцеляющая.

Радуйся, страсти наша силою молитв Твоих укрощающая;

радуйся, коемуждо просящему по потребе его подающая.

Радуйся, милостей сокровище нам открывающая;

радуйся, едина Мати, милосердие нам являющая.

Радуйся, Владычице, Неупиваемая Чаше, духовную нашу жажду утоляющая.

Кондак 4

Бурю внутрь имуще помышлений сумнительных, но с искренним покаянием притекающе к Твоему неизреченному милосердию, одержимии пианственною страстию получают исцеление и из глубины сердца вопиют Ти: Аллилуия.

Икос 4

Слыша Господь тяжкия скорби жен, стариц и детей, ихже сродницы обуреваемы суть пианственною страстию, дарова им Твою, Владычице, икону, у неяже вси притекающи обретают утешение и радость духовную и вопиют Ти со слезами:

Радуйся, Агнице, рождшая Агнца, вземлющаго грехи мира;

радуйся, Чаше, черплющая нам радость от источника бессмертия.

Радуйся, скорбных матерей утешение, ненадежных надеждо;

радуйся, скорбящих отрадо.

Радуйся, благодати явление;

радуйся, веры утверждение.

Радуйся, волнение страстей утишающая;

радуйся, руку помощи Твоя требующим простирающая.

Радуйся, Владычице, Неупиваемая Чаше, духовную нашу жажду утоляющая.

Кондак 5

Боготечную звезду, честную икону Твою показала еси нам, Владычице, юже зряще и с верою сердечною молящися Тебе, Богородице, глаголем: исцели пианственною и всякою иною болезнию души и тела страждущих, верных же научи воспевати хвалу Богу: Аллилуия.

Икос 5

Видяще чудеса преславная и знамения пречудная, бываемая не токмо от иконы Твоя, Богомати, во граде Серпухове явленные, но и от всех по подобию сея иконы написанных изображений, припадающе к ним смиренно, вопием Ти:

Радуйся, скоропредстательная Помощнице усердно к Тебе притекающих; радуйся, благосердая Услышательнице молений наших.

Радуйся, град Серпухов благословением Твоим осенившая;

радуйся, и в пределах Московских славу чудес Твоих показавшая.

Радуйся, серпуховская Владычице, сокровище исцелений неоскудное; радуйся, инокинь тамо благо подвизающихся всемогущая Покровительнице.

Радуйся, ведущим брань противу мира, плоти и диавола добрая Споспешнице;

радуйся, и в мире благочестно живущих усердная Заступнице.

Радуйся, Владычице, Неупиваемая Чаше, духовную нашу жажду утоляющая.

Кондак 6

Проповедающе чудеса Твоя, Богородительнице, от иконы Твоя, Неупиваемая Чаша именуемая, бываемая, молим Тя, Пречистая, со слезами: избави всех нас от падений греховных, научающи воспевати Богу: Аллилуия.

Икос 6

Возсияла еси в светлости Божественных славы, Дево Богородице, на Младенца Предвечнаго Господа нашего Иисуса Христа зрящая, Иже в сосуде аки в неупиваемой чаше предстоит, якоже Тя видим, изображенную на иконе Твоей, Неупиваемая Чаша таинственно нареченной, от неяже избавление

пианственные болезни притекающим с верою даруеши, во еже пети Тебе гласы немолчными сице:

Радуйся, о Нейже радуется и торжествует Ангельский собор и человеческий род;

радуйся, Еяже слава превосходит похвалы земныя и небесныя.

Радуйся, таинственным изображением Сына в сосуде тайну Божественныя Евхаристии нам открывающая;

радуйся, рожденного Тобою Агнца, всегда ядомаго и никогдаже иждиваемаго, нам указующая.

Радуйся, Чашею Жизни и бессмертия ко вратом Вечныя Жизни нас приводящая;

радуйся, источником нетления и радости жаждущия души напаяющая.

Радуйся, неисчетною благостынею не оставляющая презренных и отверженных;

радуйся, от рова погибели сердоболием Твоим исхищающая ненадежных.

Радуйся, Владычице, Неупиваемая Чаше, духовную нашу жажду утоляющая.

Кондак 7

Хотя некий человек возблагодарити Тя, Владычице, за исцеление от пианственного недуга, украси Твою пречудную, Богомати, икону, во граде Серпухове пребывающую, из глубины сердца воспевая Богу: Аллилуия.

Икос 7

Новое чудо видим, Владычице, от иконы Твоея святыя: страждущий бо пианственным недугом некий раб Божий Стефан, прибегая к Твоему Матернему предстательству, от тяжкаго недуга своего избавися и, благодаря Тя, благолепными дарми икону Твою украси, и, припадая к ней, со слезами возопи Тебе тако:

Радуйся, живоносный источниче исцелений;

радуйся, чаше небесная божественных дарований.

Радуйся, реко исцелений приснотекущая;

радуйся, море, всех наших страстей потопление.

Радуйся, благодарственная приношения не отвергающая;

радуйся, сердца благочестивых людей возвеселяющая.

Радуйся, крепкия веры Подательнице;

радуйся, всех благих деяний Исполнительнице.

Радуйся, Владычице, Неупиваемая Чаше, духовную нашу жажду утоляющая.

Кондак 8

Странно и сумнительно неверующим слышати, како икона Твоя святая «Неупиваемая Чаша» божественных исцелений источает чудеса. Мы же, верующе словеси Твоему, Владычице, реченному к первописанной иконе: «С тобою Моя благодать и сила», — веруем, яко от сея иконы Твоя благодать Твоя выну истекает. Темже, благоговейно покланяющися, лобызаем ю, вопиюще Богу: Аллилуия.

Икос 8

Все упование людие, страждущии болезнию пианства, на Тя, Владычице, возлагают, прекланяещися бо немощем и страстем нашим. Кто бо нас, грешных, изведет из рова погибели и нищеты духовныя и телесныя, аще не Ты, Владычице! Сего ради прекланяем колена пред Твоим пречудным образом и вопием Ти тако:

Радуйся, по молитве грешных людей, призывающих Тя в помощь свою, небесную благодать низпосылающая;

радуйся, глубину милосердия Твоего грешным показующая.

Радуйся, доблести и веры богатство неистощимое;

радуйся, духа уныния и боязни отгнание.

Радуйся, отчаявшихся и ненадежных ободряющая;

радуйся, удрученным болезнию пианства руку помощи простирающая.

Радуйся, терпеливых страдальцев дарми благодатными утешающая;

радуйся, суетныя радости мира сего презирати нас научающая.

Радуйся, Владычице, Неупиваемая Чаше, духовную нашу жажду утоляющая.

Кондак 9

Всякое естество ангельское удивися делу Твоего милосердия, Господи, яко даровал еси грешному роду человеческому Заступницу и Помощницу, к нашим немощем прекланяющуюся, от недуга пианства свободящую, верныя же научающую пети Ти: Аллилуия.

Икос 9

Вития человечестии недоумеют хвалити, славная Владычице, Твоя иконы праздник, ниже от скверных устен наших приносимыя Тебе похвалы достойны суть, обаче неисчетная благоденя, иконою Твоею являемая, видевше, душею и сердцем радуящися, Ти глаголем:

Радуйся, яко от лика Твоего чудеса деются;

радуйся, отвергающих Тя посрамление.

Радуйся, от всякаго зла прибегающих к Тебе избавляющая;

радуйся, кротким сиянием Твоим мрак грехов и страстей наших разгоняющая.

Радуйся, свеще неугасимая, веры огонь воспламеняющая;

радуйся, Благодатная, яко Тобою с нами Бог.

Радуйся, добраго ответа нам пред Судиею Праведным усердная Ходатаице; радуйся, души православных любовью к Тебе и Сыну Твоему исполняющая.

Радуйся, Владычице, Неупиваемая Чаше, духовную нашу жажду утоляющая.

Кондак 10

Спасти хотящи люди многия, страждущия недугом пианства, чудную Твою, Богомати, икону нам даровала еси, сего ради одержимии сим недугом к чудотворному образу Твоему притекают и, получивше исцеление, умильно Богу зовут: Аллилуия.

Икос 10

Стена еси и щит, Богомати, людем, пианственною болезнию страждущим и всем усердно к Тебе притекающим и икону Твою благоговейно чтущим, ибо сию дарова нам благих податель Господь в помощь и врачевание, еяже ради внушает нам пети: Радуйся, отчаянных надежде, печали их утоляющая; радуйся, Твоею благодатию нас недостойных осиявающая.

Радуйся, нашу скверну чистотою Твоею очищающая;
радуйся, брение наше тленное в нетление обращающая.

Радуйся, неможение наше утверждающая;
радуйся, облегающий нас облак страстей скоро разгоняющая.

Радуйся, от уныния тяжкаго нас избавляющая;
радуйся, в молитве ко Творцу всяческих нас укрепляющая.

Радуйся, Владычице, Неупиваемая Чаше, духовную нашу жажду утоляющая.

Кондак 11

Пения нашего смиренного, от полноты любви и усердия Тебе приносимое, не презри, Чистая, и не отвороти отчаявшихся и страждущих недугом пианства людей, но помози им же и нам очиститися от всякия скверны греховныя, да возможем достойно и праведно пети Богу: Аллилуия.

Икос 11

Светоприемную свещу зрим Тя, Пресвятая Дево, и на святей иконе Твоей, посреде лика угодников Твоих, лучами благодати неизреченно блистающую, отнюдуже, во мраце грехов своих просвещеннии и на светлую стезю добродетелей наставляемии, зовем Тя почитании сими:

Радуйся, заступлением Домники преподобныя избавляющая нас от суеты мира сего многомятежнаго;

радуйся, тоя предстательством помогающая нам в борьбе с прираженьми страстей плотских.

Радуйся, молитвами священномученика Харалампия мысль благую в сердце нашем полагающая;

радуйся, того ходатайством нечистую совесть просвещающая.

Радуйся, молитвами Параскевы мученицы от мучительнаго недуга пианства страждущих избавляющая;

радуйся, тоя заступлением страждущих к искреннему раскаянию и вразумлению призывающая.

Радуйся, купно со священномучеником Антипою озлобленных всех души умягчающая;

радуйся, вкупе с ним на помощь Тя призывающих и имя Твое славящих спасающая.

Радуйся, Владычице, Неупиваемая Чаше, духовную нашу жажду утоляющая.

Кондак 12

Благодать Божия, присущая святей иконе, Неупиваемая Чаша именуемой, влечет к ней, Владычице, всех скорбящих, плачущих, обездоленных, вдов и сирот, наипаче же всех страждущих недугом пианства, и не тщи отходят, Владычице, от неупиваемыя чаши Твоих Божественных дарований, но, неоскудно получающе цельбы от чудотворнаго образа Твоего, Всеблагая, благодарственно поют Богу: Аллилуия.

Икос 12

Поюще Твоя чудеса и велию милость, людем, одержимым пианственною страстию, явленная, молим Тя, Владычице: спаси и помилуй и не остави нас, ищущих Твоего предстательства и зовущих Ти:

Радуйся, воистинну бедным помощнице;

радуйся, страждущих присное врачевство.

Радуйся, благодушных велия радости;

радуйся, малодушных дивное ободрение.

Радуйся, бед и скорбей скорая Избавительнице;

радуйся, верных всемилостивая Утешительнице.

Радуйся, гордых смиряющая;

радуйся, смиренныя возвышающая и всем спасения желающая.

Радуйся, Владычице, Неупиваемая Чаше, духовную нашу жажду утоляющая.

Кондак 13

О Премилосердая Сладчайшаго Господа нашего Иисуса Христа Мати, нынешнее услыши наше моление и избави нас от всех недугов душевных и телесных, наипаче же свободы страждущих недугом пианства, да благодарственно вопием Богу: Аллилуиа, аллилуиа, аллилуиа. (Трижды).

Этот Кондак читается трижды, затем Икос 1-й «Ангельстии чини...» и Кондак 1-й «Взбранное и дивное...»

Молитва

Царице наша Преплагая, надеждо наша, Пресвятая Богородице, приятелище сирых и странных Заступнице, бедствующим помощи и озлобляемых покрове. Зриши нашу напасть, зриши нашу скорбь, отовсюду искушеньми одержими есмы, и несть избавляяй. Ты убо Сама помози нам, яко немощным, окорми нас, яко странны, настави нас, яко заблудших, уврачуй и спаси нас, яко ненадежных. Не имамы бо иныя помощи, ни иного предстательства, ни утешения, токмо Тебе, о Мати всех скорбящих и обремененных. Призри на нас, грешных и во озлоблении сущих, покрый нас пречистым омофором Твоим, да избавлени будем от зол, обышедших нас, наипаче же от пианства, да восхвалим всегда пресвятое имя Твое. **Аминь.**

Тропарь, глас 4:

Днесь притецем вернии / к божественному и пречудному образу Пресвятая Богоматере, / напаяющей сердца верных неупиваемой чашей небеснаго Своего милосердия. / И людем верным чудеса показующей. / Яже видяще и слышаще духовно празднуем и тепле вопием: / Владычице милосердная, / исцели наша недуги и страсти, / молящи Сына Твоего, Христа Бога нашего, // и спаси души наша.